

# Kart daa bsel' to ben' lao ben' hebreoka', ben'ka' nonlilall' Jesucristona'

**1** Kani'yi zan shii Chioza' bchine' dii ben'ka' wdixjee daa golle' legake' na' aga toz ka bchine' to toe' kwenche be'lene' dii xozxto'choka' dill'. **2** Na' na ba zoa te che yell-lioni, Chioza' bselee Xiine'na' be'lene' cho' cho'a xtilleena', na' len' nzoe' gak lall' nee yog'te dii de, na' lekzen' bene' yabana' len yell-lioni, diika' bllia Chioza' bia' gak.

**3** Len' chli'e ka ben' choo ben' xen inlleb nak Chioza', na' chli'e ka nakyen' Xe' Chioza'. Na' len' chone' kwenche yabana' len yell-lioni na' yog'lol diika' lle' lla' lawinka' chongakan kon ka bllie' bia' gongakan daa nape' yel' wak kwenche chak kon ka ne'. Na' len' bixis biyibe' yichjlall'do'chona' ka bikwase' saaxya chechoka', na' biyolla' biyepe' yabana' gana' chi'e shlaa de shli che Xe' Chioza', beena' nak ben' choo ben' xen, na' chnabia'lene'ne'.

**4** Na' daa bene' dga, bli'e nake' ben' zak'chi aga ka anjlka', na' lekzka' daa goll Chioza'ne' "Xiiñ", nakbia' nake' ben' zak'chi aga ka legake'. **5** La' Chioza' biga golle' ni to anjlka' ka dga golle' Xiine'na':

Li' nako' Xiiñ,  
na' na daa solo inabi'o inezzi ben' nadaan nak' Xo'.  
Na' ni to anjlka' bi golle':  
Nad' gak' Xo',  
na' li' gako' Xiiñ.

<sup>6</sup> Na' lekzka' ka bsel' Chioza' Xiiñe'na', beena' nak tlish' tyaj, lo yell-lioni, wne':

We'la'oshga yog'lol anjl cha'ka' le'.

<sup>7</sup> Na' Cho'a Xtil' Chioza' cho'en dill' che anjlka', nan:

Chone' anjl che'ka' ben'ka' chon xshine'na',  
ka be' na' ka bel yi'.

<sup>8</sup> San che Xiiñ Chioza' nan:

Li' nako' Chios na' inabi'o zejli kanı.

Na' yel' wñabia' cho'na' nakan dii zej shli.

<sup>9</sup> Chibailo' yel' li yel' shawaa na' chwiilo' daa nak mal.

Daan Chioza', beena' nak Chios cho', ba bzoe' li' kwenche inabi'o,  
na' ba bene' ka soacho' mbalaztech aga ka ben'ka'  
nako' txen.

<sup>10</sup> Na' lekzka' nan:

Lin' nako' Chios, na' lin' bxé bsilo' yell-lioni ka wzolon,

na' li'kzan bxé bsilo' yabana'.

<sup>11</sup> Yog' diika' te chegakin, san li' zoakzo' zejli kanı.

Na' yog' diika' yiyigakan ka chiyi to xalaan ben'.

<sup>12</sup> Na' yikwasgako'n,

na' yikobgako'n ka to ben' chikob xalaane'.

San li', toz ka zo' zejli kanı;

biga llia te cho'.

<sup>13</sup> Ni shlin bin' ye' Chioza' ni to anjl che'ka':

Wche' kwit' de shli ni, shlak wzoa' xñi'ona' ben'ka'  
chakzbani lí'.

<sup>14</sup> San yog' anjlka' nakgake' wen llin che Chioza',  
na' chselee legake' chaklengake' cho' nakcho ben'  
yisle' kwenche bi kwiayi'cho.

## 2

<sup>1</sup> Daan, chonan byen wzenagchcho do yichj do lall'cho dill' wen dill' koba' daa ba benicho kwenche bi laacho lo xneze'na'. <sup>2</sup> La' diika' bllia Chioza' bia' goncho, diika' wdixjee anjlka', gok-gakan to dii zakii, na' yog' ben'ka' wdishgake' cho'a xtilleena' na' bi bzenaggake'n wxak'zi'gake' kon ka chiyal' gak chegake'. <sup>3</sup> ¿Alechlə naa aga wilacho lao yel' zak'zi'na' shi gonicho nakzi daa nak to dii zakii nlleb daa ba ben Chioza' checho kwenche yisle' cho' na' bi kwiayi'cho? Žigaate Xancho Jesúza' wdixji'e daa yisle' cho', na'tech ben'ka' bzenag che' bizchopgake' dillaa bi'e. <sup>4</sup> Na' lekzka' Chioza' bli'e nan nakan dii li daa bene' ka ben ben'ka' dii zan yel' wak na' dii chon ka chibanicho, na' bselee Espíritu Santo che'na' bene' wde wdeli dii gak gon to tocho kon ka chaklall' Chioza'.

<sup>5</sup> Aga bllia Chioza' bia' inabia' anjlka' lo yell-lio koba' daa ba ngwee xnezin gone', dga cho'a dill' cheyin naa. <sup>6</sup> San nakan ka wna to ben' bzej Cho'a Xstill' Chioza' kani'yi daa na:

¿Nora naknto', neto' ben' yell-lio, chi' yichjzo' neto', na' zezo' wneyi che neto' naknto' xiin benech?

<sup>7</sup> Zi lat'zə ki beno' neto' ka anjl cho'ka', na' noño' neto' to balaan xen wal.

Na' bzo' neto' inabia'nto' lao yog'te diika' beno'.

<sup>8</sup> Na' beno' yog'lolten lall' na'nto'.

Na' daa bene' lall' na' ben' yell-lioni yog'lol dii de, zejin aga bi de dii bi gak lall' na'cho, la'kzi naa bin' ile'icho gak yog'lol dii de lall' na'cho. <sup>9</sup> Per nezicho Jesúza' ba yo'e to balaan xen wal, la'kzi bi bllin sakee ka anjlka' shlak wde' lo yell-lioni goke'

benēch kwenche wxak'zi'e na' wite' ni checho. La' daa nak Chioza' ben' wenan, bzanile'ne' ble'ilé' yel' wita' lo laz yog'lol ben'.

<sup>10</sup> Dii li, Chioza', beena' bxe bsil yog'lolle dii de na' nakgakan che', cheenile' ben' be ben' zil gakgake' xiine' kwenche yichi'e legake' gana' de balaan xen che'na'. Daan, benan byen bzanile' Jesúza' wxak'zi'e na' wite' kwenche bisle' cho'. Na' ka', biyoll bido bene' yog'lol daa nllia Chioza' bia' gone'. <sup>11</sup> Jesúza', beena' ba bixis biyibe' cho', na' cho' ba bixi biyechcho, toz Xachon nak. Daan, bi chiyiyi Jesucristona' iné' nakcho bish' ljwelle'.

<sup>12</sup> Na' chi'e Chioza':  
Wi'a dill' cho' lao bish' ljwell'ka',  
na' gol inia' li' ladj ben'ka' chdop chllag  
choe'la'ogake' li'.

<sup>13</sup> Na' wizne':  
Nad' wxenilallaa Chioza'.  
Na' sto shii chi'e:  
Ni zoalen' ben'ki nak xiin Chioza', ben'ki bene' lall'  
na'.

<sup>14</sup> Na' daa nak xiine'ka' ben' de beli chen, lekzka' Jesúza' golje' goke' ben' de beli chen kwenche wite' ni checho. Na' ka wite', bsol bnite' yel' wñabia' che dii xiwaa daa gok lall' na'yin wlliyai'n ben'.

<sup>15</sup> Na' bisle' cho' ben' yell-lio, cho' nakcho ka ben' ndoo lao yel' wita' shlak mbancho daa chllebcho guetcho. <sup>16</sup> La' dii li, aga bid Jesúza' kwenche gaklene' anjikan', san kwenche gaklene' xiin dia che dii Abrahaman'. <sup>17</sup> Daan, benan byen goke' ben' de beli chen doxen ka nakcho, cho' bish' ljwelle', kwenche yiyes'hallile' cho' na' soe' gone' ka ben Chioza' lo nee gone' daa nake' bxoz choo bxoz xen checho. Na' bzani kwine' wite' kwenche bizi'xen

Chioza' saaxyā chechoka'. <sup>18</sup> Na' daa bizo bizakile' btile' daa nan kooyelaan le' bi gone' ka cheeni Chioza', wak gaklene' cho' kat' za' daa cheenin kooyelaan cho' goncho daa bi chazlall' Chioza'.

### 3

<sup>1</sup> Na' ḥnaa, le' ben' bish' na' le' ben' zan', le' ba nxi nyech yichjlall'do'lena' na' ba gox wñab Chioza' le' kwenche nakle lall' nee, li se wñeyi ka nak daa ben Cristo Jesúza', beena' choe'cho dill' nonlilall'chone'. Nake' beena' bsel' Chioza' na' naktie' bxoz choo bxoz xen checho. <sup>2</sup> Len' bene' yog'lol daa goll Chioza'ne', kon ka ben dii Moiséza' ladj ben'ka' nak yell che Chioza'. <sup>3</sup> Na' chidol'ch Jesúza' balañ xench aga ka dii Moiséza', ka chak che to ben' chone' to yoo chooche' balañ xench aga ka yoona' daa bene'. <sup>4</sup> Yog'z yoo zoa ben' bene'n, per Chioza' nake' beena' ben yog'lolte dii de. <sup>5</sup> Dii Moiséza', beena' gok wen llin che Chioza', bene' yog'lol diika' golle' gone' ladj ben'ka' nak yell che Chioza'. Na' diika' bene' chaklenan kwenche shajniicho diika' zi' we' Chioza' dill' cheyin. <sup>6</sup> Per Crítona', beena' nak Xiiñ Chioza', lekzka' bene' yog'lol diika' golle'ne', na' ngoo lall' nee ben'ka' nak lall' na' Chioza'. Na' chon', nakcho lall' na' Chioza' shi soachechcho gonlilall'chone' na' yibaicho daa noncho lez lljazoalenchone'.

<sup>7</sup> Daan, Espíritu Sántona' wne':  
 Shi chenile daa na Chioza' ḥnaanlla,  
<sup>8</sup> bi gakle ben' lall'do' wal ka gok dii xozxto'leka'  
 na' bshaagake' Chioza' daa bi wyajle'gake' gone' ka  
 bchebe'  
 kana' wdagake' gana' bibi chashj chleb.

<sup>9</sup> Na' wna Chioza': Kana' dii xozxto'leka' gokgake'  
ben' widenag daa bi wyajlegake' gon' daa  
bcheb' gon' chegake',

la'kzi choa yiz ble'gakile' diika' ben' chegake'.

<sup>10</sup> Daan, bllaa legake',  
na' wnia': "Toshiizi chongake' kon ka nazan  
chegake',

na' bi chzenaggake' cha'."

<sup>11</sup> Daan, lo yel' chllaa cha'na' bcheb', wnia':  
Nezganz wi'a latj gaki chegake' yel' wixi'lall'  
cha'na'.

<sup>12</sup> Le' ben' bish' na' le' ben' zan', li wsak'  
kwenche ni tole bi xinjz yichjlall'do'lena' na' go-  
nan ka bich shajle'le na' yilaala'ole Chios yaa Chios  
banna'. <sup>13</sup> San li wtip lall' ljwell-le yog' lla shlak  
naa ni de latj wzenagle che Chioza', kwenche  
bi siye' dii mala' le' na' yiyonan le' lall'do' wal.  
<sup>14</sup> Nakkzcho Crítona' txen shi shnon mbancho  
soachechcho wxenilall'chone' kon ka wzoacho  
kana' zi' bxenilall'chone'.

<sup>15</sup> Kon ka na Cho'a Xtil' Chioza':  
Shi chenile daa na Chioza' naanlla,  
bi gakle lall'do' wal ka gok dii xozxto'leka' kana'  
wdagake' gana' bibi chashj chleb, kana'  
biyechj bibiitezgake' Chioza'.

<sup>16</sup> ¿Nora ben'ka' beni daa goll Chioza' na' biyechj  
bibiitezgake'ne', lla? Yog' ben'ka' bibej dii Moiséza'  
Egiptonian' ben ka'. <sup>17</sup> Na' ¿nora ben'ka' bllaa Chioza'  
choa yiz, lla? Ben'ka' bxinj blenan, ben'ka' wit gana'  
bibi chashj chleb. <sup>18</sup> Na' ¿nora ben'ka' wna Chioza'  
chegake' bat lljazi'lall'gake' lo yell-liona' bchebe'  
wi'e legake', lla? Legaken' ben'ka' gok ben' widenag

lawe'na'. <sup>19</sup> Na' nezicho bi gok yillingake' gana' yizi'lall'gake' daa bi wyajle'gake' che'.

## 4

<sup>1</sup> Daan, shlak ni de latj idolicho yel' wixi'lallaan daa ba bcheb Chioza' gone' cho', chiyal' goncho byen kwenche idol' illonichon na' ni tocho bi igaanzcho ka'z. <sup>2</sup> La' cho' ba benicho dill' wen dill' kob che Chioza', ka daa beni dii xozxto'choka'. Per la'kzi bengakile'n, bi goklenan legake' daa bi wyajle'gake' cheyin. <sup>3</sup> San cho' ba wyajle'cho cheyin ba nakten gon Chioza' cho' yel' wixi'lallaan daa bllonile' ben'ka' kana' wne':

Daa bllaa legake' na' wnia:

nezganz wi'a latj gaki chegake' yel' wixi'lall' cha'na'.

Per ka nak Chioza', wzoloe' chizi'lallee ka biyoll bxe bsile' yell-lioni. <sup>4</sup> La' Cho'a Xtilleena' cho'en dill' che lla gall llana', gana' nan:

Ka bllin lla gall llayina', ba biyoll ben Chioza' yog'lol daa bene', na' bizi'lallee.

<sup>5</sup> Na' lekzka' cho'en dill' kana' wne':

Nezganz wi'a latj gaki chegake' yel' wixi'lall' cha'na'.

<sup>6</sup> Per ni de latj gat' to yel' wixi'lall' che zi bal ben' cheeni, la' ben'ka' bengakile' dii nech dill' wen che Chioza' bi gok yillingake' gana' yizi'lall'gake' daa bi bzenaggake' che'. <sup>7</sup> Daan, bllia Chioza' bia' che sto lla, na' wde zan yiz wnie' dii Davina' kwenche wi'e dill' che llani naa, na' wne':

Shi chenile daa na Chioza' naanlla,  
bi gakle lall'do' wal.

**8** Shel' dii Josuéna' bene' ka yizi'lall' dii xozxto'choka' ka b<sub>cheb</sub> Chioza' gone' chegake', aga bllia Chioza' bia' sto lla yoblə gat' yel' wixi'lall', shel'ka'. **9** Daan, nezicho ni de latj idol' ben'ka' nak lall' na' Chioza' yel' wixi'lall' che'na'. **10** La' beena' ba bdoli yel' wixi'lallaa daa b<sub>cheb</sub> Chioza', ba chizi'lallee ka bizi'lall' Chioza' kana' biyoll b<sub>xē</sub> bsile' yog'<sub>lol</sub> dii de. **11** Na' cho' chiyal' goncho byen idolicho yel' wixi'lallaa daa b<sub>cheb</sub> Chioza' kwenche ni tocho bi gakcho ben' widenag ka gok ben'ka' kani'yi.

**12** Na' cho'a xtil' Chioza' nsa'n yel' mban na' yel' wak, na' nakan ka to dii ch<sub>chogch</sub> aga ka to spad dii nlatit chop laa. La' chazan ga zeelo loo yichjlall'do'chona'. Na' chli'n lao daa chza'lall'cho loo yichjlall'do'chona' shi nakan wen wa shi nakan mal. **13** Ni to diika' b<sub>xē</sub> bsil Chioza' bi ngashaan lawe'na'. Yog'<sub>lolte</sub> nez nle'i beena' yizi'e cho' kwent.

**14** Jesús, Xiiñ Chioza', beena' billin yabana', nake' b<sub>xoz</sub> choo b<sub>xoz</sub> xen checho, na' daan chiyal' soachechcho gonlilall'cho beena' choe'cho xtiliinna'. **15** Na' b<sub>xoz</sub> choo b<sub>xoz</sub> xen chechona' chiyesh'lallile' cho' daa nakcho ben' yell-lioz, la' lekza' btile' daa nan kooyelaan le' wxinj wlene' ka chak checho, per le', wzo wzakile' bi b<sub>xinj</sub> blene'. **16** Daan, do lall'cho chiyal' ibig'cho xni'a Chioza', beena' chnabia' na' nake' ben' chiyesh'lallii, kwenche yizi'xene' checho na' gaklene' cho' kat' bittezə dii chak checho.

## 5

**1** Chioza' chbeje' yog' b<sub>xoz</sub> choo b<sub>xoz</sub> xenka'

ladj ben' Israelka', na' chzoe'ne' kwenche inabe' gaklene' ben' wlall che'ka' na' lljwee lawe'na' yog' daa chzangakile', na' chite' bayix'ka' kwenche chizi'xen Chioza' saaxy'a che'ka'. <sup>2</sup> Na' beena' nak bxoz choo bxoz xen nape' yel' chxenlall' che ben'ka' chxinj chlen daa bi ntegakile', la' lekzka' zoe' dii nxoll wxinj wlene' daa nake' ben' de beli chen. <sup>3</sup> Daan, chonan byen chite' bayix'ka' kwenche yizi'xen Chioza' saaxy'a che'na', na' ka'kz chone' che ben' wlall che'ka'.

<sup>4</sup> Na' kono chzoa kwinin gake' bxoz choo bxoz xen tobia'loze', san Chiozan' chbeje' beena' gak bxoz choo bxoz xen che', ka bene' che dii Aarónna'. <sup>5</sup> Na' lekzka' Críston'a', aga tobia'lozen' ben kwine' bxoz choo bxoz xen, san Chiozan' wlo'ene' balaan daa bzoe'ne' nake' bxoz choo bxoz xen. Na' kwine' golle'ne':

Li' nako' Xiiñ',

na' naa daa solo inabi'o inézi ben' nad' nak' Xo'.

<sup>6</sup> Na' lekzka' Cho'a Xtill' Chioza' nan:

Li' nako' bxoz zejli kani,

ka bxoz Melquisedeca'.

<sup>7</sup> Na' Críston'a', shlak wbane' yell-lioni, wchelle' na' wnie' zillja, wñabile' Chioza', beena' nap yel' wak kwenche yisle'ne' lao yel' wita', na' daa goke' ben' wizoa dill', Chioza' bzenague' che'. <sup>8</sup> Na' la'kzi goke' Xiiñ Chios, diika' bllagloe' benan ka wyajniile' daa nak yel' wizoa dill'. <sup>9</sup> Na' ka', biyoll bido goke' ka chiyal' gake' kwenche wi'e yel' mban daa bi te cheyin ben'ka' chzoa xtilleena'. <sup>10</sup> Na' Chioza' bzoe'ne' goke' bxoz choo bxoz xen ka gok Melquisedeca'.

**11** Dii zanch de dii we'len' le' dill' che diiki ba wnia', per chonan lallj wzajniida'n le' daa bi chonle ka dii le. **12** Naa ba gok sshā nombia'le cho'a xtil' Chioza', len' ba chiyal' wli' wsedilen ben' yoblə, shel'ka'. Per le'lə ni chyalljzile no wzajni'chi le' diika' bi chontek lallj shajniile che cho'a xtil' Chioza' daa ba bsedle. Ni chonzle ka bi'do' ni chall' na' bin' gak gaob' yel' wao. **13** Na' nottezə ben' bin' shajniile' bi daa nak wen na' bi daa nak mal nake' ka bi'do' ni chall'. **14** San ben'ka' chzoachech chzenaggake' che Chioza', chakbe'gakile' daa nak wen na' daa nak mal. Legaken' nakgake' ka ben' ba cheej chao yel' wao, aga ka bi'do'na' ni chall'.

## 6

**1** Daan, chiyal' goncho ka dii le gakchachcho lo xñez Críston'a', na' bi yiyechj yibiilenzcho diika' ba nezkzicho: ka daa chiyaj chilenicho dii malka' bencho daa nsa' yel' wit, daa gonlilall'cho Chioza', **2** daa chchoa ben' nis, daa chxoa na'choka' yichj ben' kat' chñabcho gaklen Chioza'ne', daa yiban ben' ladj ben' wetka', na' daa wchoglo Chioza' che ben' ga idol' to toe' zejli kani. **3** Chioza' gaklene' cho' kwenche goncho ka dii le gakchachcho.

**4** Ben'ka' ba yoo beeni' che Chioza' loo yichjlall'do'eka', na' ba bnix blliagake' dii wenna' cho'e ben'ka' nak lall' nee, na' zoalen Espíritu Sántona' legake', **5** na' ba bnix blliagake' dill' wen che Chioza' na' yel' wak che'na' daa yiyoll yido ile'icho kat' illin llana', **6** shi yilaala'ogake' lo xñez Chioza', bich inan yiyaj yilengakile' sto shii. La' lengake' ba chongake' ka ben ben'ka' betgake' Xiiñ Chioza' lee yag cruza' na' chsi'gake'ne' yel' zto'

ladj lkwe' ben'. <sup>7</sup> Benecha' zaklebile' to yell-lio dii chiyaalli kat' cheejan nis yeja' daa chxop zekizezi lawinna'. Shi nakan yell-lio wen, beena' chaz chaanyitope' daa yeej gawe' lawinna', na' Chioza' gone' ka gashj ilebchan dii wenka'. <sup>8</sup> San shi chashj chlebzan no yag yesh' na' no yag ley, aga bi zakii yell-liona' na' chishj Chioza' bia' blag' cheyin na' wzey wtie'n.

<sup>9</sup> Na' le' ben' bish'dawaa na' le' ben' zandawaa, la'kzi ba wnia' ka', nezid' kwaslol gonle wen lega ben' ba bisla Chioza'. <sup>10</sup> Na' Chioza' nake' ben' li ben' shao', na' bi gal-lallee dii wenka' ba benle na' daa ba bli'le chakilene' daa goklenle ben'ka' naklenle lall' nee, kon ka ni chonle naa. <sup>11</sup> Na' cheenid' to tole soale gonchle wen do yichj do lall'le shnon mbanle, kwenche gak chele ka ba nonle lez. <sup>12</sup> Bi gakle ben' lia, san li gonto ka ba chon ben'ka' zoatezi zoagake' chonlilall'gake' Chioza' na' chzi'gake' banez daa bchebe' wi'e legake'.

<sup>13</sup> Ka bcheeb Chioza' gone' wen che dii Abraham'a, bzoa kwine' de taschiw gone' ka bchebe', la' koch no zoa ben' zak'chi ka le' wzoe' de taschiw. <sup>14</sup> Na' golle': "Dii li gonleey' li' na' gon' ka shesh shan xiin dia cho'ka'." <sup>15</sup> Na' dii Abraham'a wdape' yel' chxenlall' wleze' axt ki bllin lla gok ka bcheeb Chioza' gone' che'. <sup>16</sup> Kat'ka' ben' yell-lioki chchebgake' to dii gongake', chzoa-gake' to ben' zak'chi ka legake' kwenche chakbal daa chchebgake', na' len chonan ka shajle' ben' chegake'. <sup>17</sup> Na' ka'kzə Chioza', goklallee inezi ben'ka' ikaa dii wenna' zi' gone' nan aga wde daa bchebe', san dii li, gonkze' ka wne'. Daan, bzoa

kwine' de tas̄hiw. <sup>18</sup> Na' ka nak daa b̄chebe' gone' len daa bzoa kwine' de tas̄hiw zejin aga wishee daa wne' gone', ni bi chziyee. Na' daa ɳezicho dga, chtipan lall'cho, cho' ba wbig'cho lawe'na' na' ba nxenilall'cho gone' ka ba b̄chebe'. <sup>19</sup> Ka chak che barkwa' ch̄chinan to dii chbekwan daa tozga, kan' chon daa ba noncho lez Crítona', chaklenan cho' chajle'chacho na' bi gak choplall'cho. Loo lill xl̄atj Chioza' wze lechaa daa bkwashaan latja' gana' wzoe' na' bi gok sho'gake', san cho' ba noncho lez sho'cho <sup>20</sup> gana' ba wyoo Jesúza' na' ch̄nabe' checho, cho' zi' yillincho na'. Na' nake' bxoz choo bxoz xen checho zejli kani ka bxoz Melquisedeca'.

## 7

<sup>1</sup> Melquisedeca' goke' ben' w̄nabia' che yella' le Salem na' goke' bxoz che Chioza', beena' liizelozí nak ben' choo ben' xen. Na' ka ziza' dii Abrahama' lo wdila' gana' bene' gan ben' w̄nabia'ka', jatil Melquisedeca' le' na' w̄nabe' ka gak wen che'.  
<sup>2</sup> Na' dii Abrahama' bene' shi kwen yog' diika' bikee che ben' w̄nabia'ka' lo wdila' na' wleje' tkwenan\* bi'en Melquisedeca'. Na' Melquisedec zejin Ben' w̄nabia' ben' chon daa nak shlichá. Na' lekzka' nake' ben' w̄nabia' che yell Salema', na' zejin ben' w̄nabia', beena' chon ka soalen Ijwellin mbalaz.  
<sup>3</sup> Kono ɳezi no gok xaxɳee ni no gok dii xozxto'e, ni kono ɳezi bat golje' na' bat wite'. Daan nake' bxoz zejli kani ka nak Xiiŋ Chioza'.

<sup>4</sup> Li wwia ka ben' zakii nlleb gok Melquisedeca', la' kwin dii xozxto'cho Abrahama' bi'ene' tkwen

---

\* <sup>7:2</sup> Bene' shi kwen yog' diika'...na' wleje' tkwenan: Literalmente la décima parte.

che de shi kwen che yog' diika' bikee che ben'ka' bene' gan lo wdila'. <sup>5</sup> Ley che dii Moiséza' nan ben'ka' nak xiin dia che dii Levína', ben'ka' nak bxoz, chiyal' ikaagake' tkwen che de shi kwen che yog' daa chon to to ben' wlall che'ka' gan, ben'ka' nak bish' lwellgake', la'kzi lengake' nakgake' xiin dia che dii Abrahama'. <sup>6</sup> Per Melquisedeca', la'kzi bi goke' dia che dii Levína', dii Abrahama' bi'ene' tkwen de shi kwen che yog' diika' bikee che ben'ka' bene' gan lo wdila'. Na' Melquisedeca' wnabe' gak wen che dii Abrahama', beena' b̄cheb Chioza' shesh shan xiin dia che'na' na' gaki che' yelliona' gana' wzoe'. <sup>7</sup> Na' nezicho kwaslol beena' chnabe' ka gak wen che ben', nakche' ben' zak'chi aga ka beena' chnab gak wen che'. <sup>8</sup> Na' ka nak bxozka' chkaa tkwen che de shi kwen che yog' diika' chat' chbe' che ben' wlall che'ka', nakgake' ben' chet. San che bxoz Melquisedeca', Cho'a Xtil' Chioza' cho'en dill' mbane' toshiizi. <sup>9</sup> Na' bxozka', ben'ka' chkaagake' tkwen che de shi kwen che yog' diika' chon ben' wlall che'ka' gan, nakgake' xiin dia che dii Levína', na' wak inacho lenkzgaken' be'gake' Melquisedeca' daa be' dii Abrahama' le', <sup>10</sup> la' kana' jatil Melquisedeca' dii Abrahama', ba nakkzan galj dii Levína' na' gake' xiin dia che dii Abrahama'.

<sup>11</sup> Chioza' wleje' dii Aarónna', beena' nak xiin dia che dii Levína', gake' bxoz kana' bi'e dii xozxto'choka' ley che'na'. Per bxozka' wzoa lo dia che dii Aarónna' bi gok yiyongake' cho' ben' li ben' shao' lao Chioza'. Daan, benan byen soa sto bxoz yoblə, beena' gak ka bxoz Melquisedeca'. <sup>12</sup> Na' kwenche to ben' bi nak xiin dia che dii Levína'

gake' bxoz, lekzka' chonan byen yilla' leya'. <sup>13</sup> La' bxoz chechona', beena' choe' Cho'a Xtille' Chioza' xtillee, aga golje' lo dia che dii Levína', san golje' lo dia che dii Judána', beena' konon bxoz ichej lo dia che'na'. <sup>14</sup> Nezteicho kwasłol Xancho Jesúza' golje' lo dia che dii Judána', na' Moiséza' bi bzetje' dia che Judána' ka bi'e dill' no xiiñ dia cheyin gak bxoz.

<sup>15</sup> Wyajni'chicho dga ba wnia' shi ichej to bxoz kob, beena' gak ka bxoz Melquisedeca', <sup>16</sup> to ben' bi nake' bxoz daa goljze' lo dia che dii Levína' kon ka wna leya', san nake' bxoz daa bibi de dii gak wlliayi'n yel' mban che'na'. <sup>17</sup> La' ki wna Chioza' che':

Li' nako' bxoz zejli kanı,  
ka bxoz Melquisedeca'.

<sup>18</sup> Na' daa golle' ka', zejin ba wde che leya' daa bi gok gaklenan ben'. <sup>19</sup> La' leya' bi gok yiyonan cho' ben' li ben' shao' lao Chioza', na' bich chiyal' goncho lez gaklenan cho'. San goncho lez beena' ba bzoa Chioza' yiyone' cho' ben' li ben' shao', na' ka' gak ibig'cho lawe'na'.

<sup>20</sup> Na' Chioza' bzoa kwine' de taschiw ka bchebe' gone' ka'. Ka wleje' ben'ka' nak xiiñ dia che dii Levína' gakgake' bxoz bi bzoa kwine' de taschiw gakgake' bxoz toshiizi. <sup>21</sup> Per ka nak Xancho Jesúza', Chioza' bzoa kwine' de taschiw ka bchebe' wzoe'ne' gake' bxoz, la' cho'a xtilleena' cho'en dill' chi'ene':

Nad' Chios ba bzoa' kwin' de taschiw na' aga wiya-jid' cheyi dga nia':

“Li' nako' bxoz zejli kanı,  
ka bxoz Melquisedeca'.”

<sup>22</sup> Na' daa bzoe' Jesúza' nake' bxoz zejli kaní, nxen-lall'cho gon Chioza' checho sto dii wentech aga ka daa b̄chebe' gone' dii nech. <sup>23</sup> Ben' zan ba gok bxoz choo bxoz xen, la' daa chetgake' benan byen yizoa lwaagake'. <sup>24</sup> San ka nak Jesúza', daa mbane' zejli kaní, nake' bxoz choo bxoz xen toshiizi. <sup>25</sup> Daan, wak yisle' cho' toshiizi, la' daa nonlilall'chone' wak ibig'cho lao Chioza', la' len' zoe' toshiizi chñabe' gaklen Chioza' cho'.

<sup>26</sup> Na' Jesúza', leyen'en' beena' chyalljicho gake' bxoz choo bxoz xen checho. Nake' ben' nxi nyech, ben' bibi saaxyá bene', ben' bi nda' nchene' ni to dii mal, ben' bi wlall' lao dii mala' chon ben' saaxyaka', na' biyepe' jazoe' yabana' gana' chgoogake'ne' balaan. <sup>27</sup> Na' bi chone' ka ben bxoz choo bxoz xenka', ben'ka' benan byen bet-gake' bayix'ka' yog' lla na' bzeygake'b lao Chioza' kwenche zigaate legake' chiyakken saaxyá daa chongake', na' lekzka' betgake' bayix'ka' kwenche chiyakken saaxyá che ben' wlall che'ka'. San Jesúza', shlin shluxjzan bzani kwine' wite' ni che saaxyá chechoka', na' daa bene' shlinz chonan llin zejli kaní. <sup>28</sup> Ley che dii Moiséza' bzoan ben' goke' bxoz choo bxoz xen la'kzi bi gokgake' dowalj ben' wen. Per ka ba gok sshá chon bxozka' llin, Chioza' wne' wzoe' Xiine'na', beena' toshiizi nak dowalj ben' wen, gake' bxoz choo bxoz xen, na' bzoa kwine' de taschiw gak ka wne'.

## 8

<sup>1</sup> Dga nak dii llialoch lao diiki cho'a dill' cheyin: bxoz choo bxoz xen chechona' zoe' zejli kaní na' ba chi'e shlaa de shli che Chioza' yabana' gana'

chñabi'e. <sup>2</sup> Na' nake' bxoz yabana' gana' non Xancho Chioza' dowalj lill xlatje', na' aga nakan dii ben ben' yell-lioni. <sup>3</sup> Yog' bxoz choo bxoz xenka' chzoa Chioza' legake' kwenche chjwa'gake' lawe'na' yog' daa chzani ben' wi'ene', na' chit-gake' bayix'ka' lawe'na'. Daan, lekzka' benan byen bxoz choo bxoz xen chechona' bzanile' daa bi'e Chioza'. <sup>4</sup> Shel' zoe' yell-lioni aga nake' bxoz, shel'ka', la' zoakz bxozka' choe'gake' Chioza' diika' nllia leya' bia' we'gake'. <sup>5</sup> Diika' chon bxozka' bi nakan dowalj ka daa de yabana'. Daan, ka zi' gon dii Moiséza' lill xlatj Chioza', Chioza' bzajni-ile'ne', chi'ene': "Ben byen gonle yog'te diika' kon ka ba bzajniid' li' lo yaana'." <sup>6</sup> Daa chon bxoz choo bxoz xen chechona' naa zak'chin aga ka daa chon bxozka' sto. Na' daa ba bizoe' cho' wen kon Chioza', Chioza' ba bchebe' gone' to dii zak'chi checho aga ka daa bchebe' lao dii xozxt'o'choka'.

<sup>7</sup> Shel' daa bcheb Chioza' dii nech gone' che dii xozxt'o'choka' benan ka yiaygake' ben' li ben' shao', bi benan byen bchebe' gone' sto dii yoblə, shel'ka'. <sup>8</sup> Per Chioza' ble'ile' bi ben ben'ka' ka bllie' bia', na' bene' ka wna dii beena' wdixjée xtilleena': Xancho Chioza' ne': Wllin lla  
kat' wcheb' sto dii kob dii gaklenan le',  
le' zoale Israela' na' le' zoale Judána'.

<sup>9</sup> Na' aga gakan ka daa bcheb' gon' che dii xozxt'o'leka'  
llana' bibej' legake' Egíptona'.  
La' legake' bi bengake' daa bchebgake' gongake',  
na' daan wchoonlall'gakee, na Xancho Chioza'.  
<sup>10</sup> Na' naa de sto dii wcheb' gon' kat' illin llana'  
kwenche gaklen' ben' Israelka'.

Gon' ka kwe' yichjgake' diika' ba bllia' bia'  
gongake',  
na' gon' ka kooshao'gake'n loo yichjlall'do'eka'.  
Na' nad' gak' Chios chegake',  
na' legake' gakgake' yell cha'.

**11** Na' bich gonan byen no wli' wsedi bish' ljwellin,  
ni bich gonan byen no wli' wsedi ben' dialla  
cheyin, ye'ze'ne':

"Chiyal' gombi'o Xancho Chioza",  
la' yog'z ben' gombi'e nad', ka bi'do' ka ben' gol.

**12** "Nad' yizi'xen' xtoleeka',  
na' bich lljadnid' saaxy'a che'ka'."

**13** Na' daa wna Chioza' gone' to dii kob dii gaklenan  
legake', zejin daa bchebe' gone' kani'y'i ba nakan dii  
wde cheyin. Na' daa ba nakan dii gol dii ba wde  
cheyin ba zoa yinitlon.

## 9

**1** Kana' bcheb Chioza' dii nech gaklene' ben'  
Israelka', bllie' bia' ka chiyal' we'la'ogake'ne',  
na' lekzka' bllie' bia' gongake' to lill xlatje' ga  
we'la'ogake'ne' lo yell-lioni. **2** Na' ki nak lill xlatj  
Chioza' daa bengake': bengake' lo'inna' choplə, na'  
latj necha' bsi'gake'n Latj che Chios, na' bzoagake'  
to candeler na' to mes gana' bkwa'gake' yetxtilk'a'  
lao Chioza'. **3** Na' lechaa daa bzegake' loo lill xlatj  
Chioza' kwenche bengake'n choplə bkwashaan  
latja' sto daa bsi'gake' Latj Ga Zoa Chios, **4** gana'  
bzoagake' to diido' nongake' ka mes de or gana'  
bzeygake' yala', na' sto yiin dii nwazjgake' or ka  
loolə ka koll'lin, na' bsi'gake'n yiin daa yoo daa  
chonli daa bcheb Chioza'. Na' lo'inna' wyooshao' to  
xwag de or daa yoo yel' wawa' be' Chioza' legake'

daa le maná, na' lekzka' loo yiina' wyoo bar che dii Aarónna' daa bigaa, na' yaj taaka' gana' nyoj daa nllia Chioza' bia' gongake'. <sup>5</sup> Na' koll' yiina' bzoagake' lwaas lsak' anjlka' le kerubin kwenche chli'n zoa Chioza' na', beena' yoo balaan xen. Na' xil anjlka' zen chxolgakan kollinna' gana' chxit' bxoza' xchen bayix'ka' kwenche chizi'xen Chioza' saaxyu che'ka'. Per aga diikiyen'an cheenid' wsees'chid' le' naa.

<sup>6</sup> Na' ka ba nzoagake' yog' diika', na'ch bxoza' wzolo choogake' lle' zil loo latj necha' kwenche chongake' ka bllia Chioza' bia' gongake' kat' we'la'ogake'ne'. <sup>7</sup> Per latj wchopina' tochga bxozi choo bxozi xenna' de lsens sho'e shlin non twiz. Na' kat' cho'e, chonan byen lljwee xchen bayix'ka' daa wxitee loo latja' kwenche yizi'xen Chioza' xtoleena' na' xtol' ben' wlall che'ka' daa bi chakbe'gakile' chongake'. <sup>8</sup> Na' Espíritu Sántona' chzajniile' cho' daa chon bxoza' ka' zejin shlak ni chon lill xlatj Chioza' llin daa bengake' yell-lioni, bin' gat' lsens sho'cho Latja' Gana' Zoa Chioza'. <sup>9</sup> Na' yog' diiki chzajniin cho' zoacho naa nan la'kzi be'gake' diika' bzangakile' lao Chioza' na' betgake' bayix'ka' na' bzeygake'b lawe'na' kwenche be'la'ogake'ne', diika' bengake' bi bizogakin yixis yiyibgakan yichjlall'do'eka' kwenche gongake' lez ba bizi'xen Chioza' xtoleeka' toshiizi. <sup>10</sup> Diiki zeelo bengakan llin che to beli chen che'ka'chga: ka che no dii bi gak yeej gaogake' wa ka che daa chiyal' gongake' kwenche yixis yiyib kwinkake'. Na' yog' diiki bengake' benan llin shlak bin' gon llin dii koba' bcheb Chioza' gone'.

<sup>11</sup> Per naa ba bid Críston'a', beena' nak bxozi choo

bxoz xen checho, na' nsee dii wenka' chbezcho gak. Na' lill xlatj Chioza' gana' billin Crítona' nakan dii zak'chi na' dowalj daa aga no ben' yell-lio bxe bsile'n, la' bi nakan che yell-lioni. <sup>12</sup> Na' Crítona', aga bexee no xchen shib wa no xchen goon ka wyo'e Latja' gana' zoa Chioza', san daa wlaj xchene'nan' wyo'e shlin shlaxjz, na' che toshiizin wdixje' xtol'choka'. <sup>13</sup> Bxoza' bchine' xchen goon na' xchen shib, na' de che bakdo'na' chzeygake', na' bxiteen ben'ka' bi nxi nyech lao Chioza', la' kan' na leya' chiyal' gak kwenche bixi biyech kwerp che'ka' lao Chioza'. <sup>14</sup> Na' shi kan' nakan, alechlə xchen Crítona', beena' ni to dii mal bi nda' nchene', nsa'chan yel' wak? Espíritu Sántona', beena' zoa zejli kani, gok-lene'ne' kwenche ben kwine' lall' na' Chioza' na' wlaj xchene'na' daa yixis yiyib diika' nda' nchen yichjlall'do'choka', diika' chon ka kwiayi'cho. Na' ka', inezicho ba biyakxen xtol'choka' na' gak goncho daa cheeni Chioza', beena' nak ben' yaa ben' ban.

<sup>15</sup> Daan, Crítona' bxie' dii koba' daa bcheb Chioza' gone' checho, cho' gox wnabe'. La' daa bi'e yel' mban che'na' wite' ni checho, wdixje' saaxyaka' bencho shlak ben leya' llin, kwenche gak ikaacho daa bcheb Chioza' gone' checho zejli kani. <sup>16</sup> Shi to ben' ba bene' lishi daa yikwaanlene' to ben', aga wak ikaa beena' diika' chwal' yisha' shi bin' guet beena' chikwaanan. <sup>17</sup> La' yisha' daa bene' solo gonan llin kat' ba wite', na' bibi zakiin shlak ni mbane'. <sup>18</sup> Daan, ka bxe Chioza' dii necha' bchebe' gone', bene' byen betgake' bayix'ka' blalj xchemka'. <sup>19</sup> La' biyoll bzajnii dii Moiséza' dii xozxto'choka' yog' diika' nllia leya' bia', na'ch

bex̄ee lat' xa xil' dii mben dii x̄na na' txis daa le hisopo na' b̄leeje'n loo chen che shibka' na' che goon̄ka' betgake' na' zi lat' nis, na' bx̄iteen lee libra' gana' nyoj leya', na' lekzka' bx̄iteen yog'lol ben̄ka' lle' na'. <sup>20</sup> Na' golle' legake': "Chennin chonan ka chakli daa nc̄heb Chioza' gone' checho na' lekzka' zejin chiyal' goncho yog' daa nllie' bia' goncho." <sup>21</sup> Na' lekzka' bx̄it' dii Moiséa' chenna' lill x̄latj Chioza' daa bengake' de lech' na' yog' diika' b̄chingake' lo'inna' ka be'la'ogake'ne'. <sup>22</sup> Leya' bllian bia' nan de dii zan daa chiyal' wx̄it'gake' xchen bayix'ka' kwenche yixi yiyech-gakan lao Chioza'; na' kono yiakxen cheyin shi bi lalj chenna'.

<sup>23</sup> Benan byen wlalj xchen bayix'ka' kwenche bixi biyech diika' ben llin lill x̄latj Chioza' yell-lioni, diika' nak ka bx̄en che diika' de yabana'. Per diika' de yabana', byalljin lalj to chen dii zak'chi aga ka xchen bayix'ka'. <sup>24</sup> La' Crístona' aga wyo'e loo lill x̄latj Chioza' daa ben ben' yell-lioni daa bi nakan dowalj ka daa de yabana', san yabanan' wyo'e kwenche chñabile' Chioza' yizi'xene' checho. <sup>25</sup> Na' aga zekizezin wyo'e be' kwine' blalj xchene'na', ka ben bx̄oz choo bx̄oz xenna' ze twiz wej wyo'e gana' le Latj Ga Zoa Chios kwenche bx̄itee xchen bayix'ka'. <sup>26</sup> Shel' byalljin gone' ka chon bx̄ozka', ba be' kwine' wite' zan shii, shel'ka', wzolozan ka wxe wzil yell-lioni. Per aga kan' nakan. San ɳaa llaki zeelo, shlin shluxjzan bzani kwine' wite' ni checho kwenche bsol bn̄ite' saaxyā chechoka'. <sup>27</sup> Na' kon ka llia bia' gak che to to ben' yell-lioni guete' shlinz, na'tech w̄choglo Chioza' nak gak che to toe', <sup>28</sup> ka'kzə Crístona' be' kwine'

wite' shlinzə kwenche bsol bñite' xtol' ben' yell-lioki. Na' ka yiyeđe' de wchop shiyi, aga yiyeđe' kwenche wsol wñite' xtol' bñaan, san yidixi'e ben'ka' chbezgake'nen'.

## 10

<sup>1</sup> Ley che dii Moiséza' chzajniin cho' lat' che dii wenka' zi' za' gon Chioza', na' bi nakan ka daa nak dowalj. Daan, bi chzaki leya' yiyonan ben' li ben' shao' ben'ka' yog' yiz chitgake' bayix'ka' chzangakile' we'gake' Chioza' ka nllian bia' gongake'.

<sup>2</sup> Shel' daa chitgake' bayix'ka' gok bixis biyiban saaxyä che'ka', aga wyooch yichjgake' nan nakgake' ben' saaxyä na' bich betgake' bayix'ka', shel'ka'. <sup>3</sup> Per daa betgake' bayix'ka' lao Chioza' ze twiz wej bisa'lan lall'gake' saaxyä che'ka', <sup>4</sup> la' xchen goonka' na' xchen shibka' bi gak yisol yinitan saaxyaka'.

<sup>5</sup> Daan, ka bid Crístona' yell-lioni, golle' Chioza': Aga cheenchilo' no wit bayix'lawo'na' wa izangakile' bichlə dii gongake' li', san ba beno' nad' ben' de beli chen kwenche izanid' kwin' lo lazgakin.

<sup>6</sup> Bi chibailo' no wit bayix'ka' wa wzeygake'b lawo'na' kwenche wsol wñito' saaxyä che'ka'.

<sup>7</sup> Na'ch wnja' li': "Ka choe' libr cho'na' xtillaa, Chios cha', ni zoa' kwenche gon' daa cheenilo'."

<sup>8</sup> Na' zigaate wne': "Aga cheenchilo' no wit bayix'na' wzeygake'b lawo'na' wa gongake' bichlə dii gongake' li' kwenche yizi'xeno' xtoleeka'", la'kzi nakgakan daa nllia leya' bia' gongake'. <sup>9</sup> Na'tech chi'ene': "Chios cha', ni zoa' kwenche gon' daa

cheenilo'." Na' daa golle' ka' zejin bzoe' ka'lə dii gola' ben bxozka' na' bxie' to dii kob lwaayi daa bzoe' ka'lə. <sup>10</sup> Na' daa ben Jesucristona' ka cheeni Chioza', be' kwerp che'na' na' wite' shlin shlaxj ni checho, kwenche bixi biyech yichjlall'do'chona' lao Chioza'.

<sup>11</sup> Bxozka' chilalgakile' choe'la'ogake' Chioza' yog' lla, na' zekizezi chitgake' bayix'ka' lawe'na', la'kzi biga gak yisol yinigtakan saaxyta che'ka'. <sup>12</sup> San Crítona' bzani kwine' wite' shlin shlaxj kwenche bsol bnite' xtol'choka'. Na' ka bibane', jachi'e shlaa de shli che Chioza' gana' chnabia'lene'ne'. <sup>13</sup> Na' na' zoe' chbeze' shlak wzoa Chioza' ben'ka' chwiyi le' xni'en'. <sup>14</sup> Na' daa bzani kwine' wite', biyone' ben'ka' bene' lall' na' Chioza' ben' li ben' shao' zejli kani. <sup>15</sup> Na' lekzka' Espíritu Sántona' bi'e dill' cheyi dga, kana' wne':

<sup>16</sup> Ki nak daa chcheb' gon' chegake' kat' illin llana', na Xancho Chioza':

Gon' ka kooshao'gake' loo yichjlall'do'eka' diika' nllia' bia' gongake',  
na' gon' ka kwe' yichjgake'n.

<sup>17</sup> Na' wnache':

Bichga lljadnid' saaxyta che'ka' ni xtooleeka'.

<sup>18</sup> Na' shi Chioza' ba bizi'xene' xtol' ben', aga chyalljch witgake' bayix'ka' kwenche yiakxenan.

<sup>19</sup> Le' ben' bish' na' le' ben' zan', daa ba wit Jesucristona' na' blalj xchene'na' ni checho, wak sho'cho do lall'cho Latja' Gana' Zoa Chioza'. <sup>20</sup> Daa bi'e kwerp che'na', bsalje' to nez kob dii lljwa'n cho' gana' de yel' mban zejli kani. La' kwerp che'na' zaklebin lechaa daa ze loo lill xlatj Chioza' daa bchez' ka wite', na' zejin byalj latja' gana' zoa

Chioza' kwenche gak sho'cho. <sup>21</sup> Na' Jesucristona', beena' nak liizelozi bxoz choo bxoz xen, nake' bxoz checho, cho' nakcho lall' na' Chioza'. <sup>22</sup> Daan, chiyal' ibig'cho lao Chioza' do yichj do lall'cho, na' wxenilall'cho wlebe' cho', la' nezicho ba nxi nyech yichjlall'do'chona' daa ba bsol bnite' xtol'choka', na' ba bixi biyechi kwerp chechoki nis xtila'. <sup>23</sup> Chiyal' soachechcho goncho lez lljazoalencho Chioza', kon ka choe'cho dill', la' nezicho chone' ka nchebe'. <sup>24</sup> Na' chiyal' yiyiljlall'cho naklə ka goncho gaklen ljwellcho kwenche to tocho gakchi ljwellcho na' gonchcho dii wen. <sup>25</sup> Bi chiyal' kwej yichjcho daa chdop chllagcho choe'la'ocho Chioza' ka chonz bal ben', san chiyal' wtip lall' ljwellcho, ¿alechli naa daa chakbe'icho ba zoa yiyyed Xanchona'?

<sup>26</sup> Na' shi ni chonchcho dii mala' daa nezicho bi chiyal' goncho kat' ba nombia'cho dill' li che Chioza', bich bi de we'cho Chioza' kwenche yizi'xene' xtol'choka'. <sup>27</sup> Lechozə kwezcho do chall chllebzcho wchoglo Chioza' checho llana' wzalee ben'ka' chakzbangakile'ne' lo yi'na' chal'niñ daa wlliayi' legake'. <sup>28</sup> Kat' to ben' bi chzenague' che ley che dii Moiséza', shi zoa chop shon ben' ble'gakile' daa bene', na' chchoglo guete' na' kono gak yiyyesh'lallii le'. <sup>29</sup> ¿Alechlin ki gak yel' zak'zi'na' idol' beena' chonile' nakzi Xiñ Chioza' na' xchene'na' daa blalje', na' chnie' zban che Espíritu Sántona' beena' chiyyesh'lallii cho'? La' xchene'nan' bixis biyiban yichjlall'do'chona', na' ka blalje'n bxie' dii koba' daa bcheb Chioza' gone' checho. <sup>30</sup> Na' nezicho Chioza' wne': "Nad' yizi'a wzon che beena' chon dii mala', na' wsak'zi'ane' ka chiyal' gak che'." Na' lekzka' wne': "Nad' Xanle

wchogloa' chele, le' nakle yell cha'.<sup>31</sup> jNyesh'laz wal inlleb gak che beena' wchoglo Chios yaa Chios banna' che' sak'zi'e!

<sup>32</sup> Li lljadini ka nak dii lalljka' ble'ile ka bleble beeni' che Chioza' loo yichjlall'do'lena', na' bizo bizakile' yel' zak'zi'ka' bdil bllagle. <sup>33</sup> Bal-le biya dii ben wna ben' le' na' biya dii bchi' bsak'gake' le' lao lkwe' ben'. Na' zi bal-le goklenle ben'ka' biya dii gok chegake'. <sup>34</sup> Na' biyeshile' ben'ka' got' lillyana', na' wzoale mbałaz la'kzi bikaa ben' bi dii de chele, daa nezile de to dii wench chele yabana' daa bi te cheyin. <sup>35</sup> Daan, bi kwej yichjle daa nxenilall'le Chioza', la' to banez choo banez xen si'le cheyin. <sup>36</sup> Chiyal' so sakile diika' chen chle'ile kwenche yiyołl yido gonle ka cheeni Chioza' na' gaki chele daa nchebe' goñe'. <sup>37</sup> La' Cho'a Xtil' Chioza' nan: Ba zoa gaoshosh yiyołd beena' chiyal' yiyołd, na' aga wllachile'.

<sup>38</sup> Na' beena' nak ben' li ben' shao' daa nonlilallee nad' ibane' zejli kañi.

Na' shi bich gonlilallee nad', bich ile'shiidee.

<sup>39</sup> Per cho', aga nakcho ka ben'ka' kwiayi' daa chibiigake' bich chonlilall'gake'ne', san cho' zoacho nonlilall'chone' yilacho bi kwiayi'cho.

## 11

<sup>1</sup> Daa nonlilall'cho Chioza', lennan' chonan kwenche chakliyicho daa noncho lez na' chajle'chacho cheyi daa bin' ile'icho. <sup>2</sup> Daa benlilall' dii xozxto'choka' Chiozan', ble'shiile' legake'.

<sup>3</sup> Na' daa nonlilall'cho Chioza', nezicho len' bxe bsile' yabana' len yell-lioni na' ka bene'n aga bi

bchine', san kon ka wnie' wxe wzil yog' diika' chle'icho.

<sup>4</sup> Daa benlilall' dii Abela' Chiozan', bi'ene' to dii zak'chi aga ka daa be' dii Caínna'. Na' daa benlilalleene', Chioza' wne' che' goke' ben' li ben' shao' na' bibaile' diika' bi'ene'. Na' la'kzi ba wit dii Abela', daa benlilallee Chioza' ni chzajniin cho' ka chiyal' goncho.

<sup>5</sup> Na' daa benlilall' Enoca' Chiozan', bi ble'ile' yel' wita', san Chioza' bikeene' shi'a shbane' na' koch no ble'i le'. Na' ka zi' yikaa Chioza'ne' wzeyi che' chone' ka chazlall' Chioza'. <sup>6</sup> Na' shi bi gonlilall'cho Chioza', aga wak goncho ka ile'shiile' cho', la' chonan byen beena' cheenile' gombi'e Chioza' chiyal' shajli'e che' nan zoakze' na' chone' wen che ben'ka' chiyilj le'.

<sup>7</sup> Daa benlilall' dii Noéna' Chiozan', wyajli'e ka bsi'nile'ne' che yejsiwaadaa zi' za' gak daa konon' yen ile'i. Na' daa bblebe' Chiozan', bzenague' che' na' bene' barkwa' gana' wyoo do bxooqe' kwenche bilagake'. Na' daa benlilallee Chioza' na' bzoe' xtilleena', bli'n ben'ka' wlliayi' yell-lioni gokgake' ben' mal. Na' Chioza' ble'ile'ne' ben' li ben' shao' daa benlilalleene'.

<sup>8</sup> Na' ka'kzə dii Abrahama', daa benlilallee Chiozan', bzenague' ka goxe' le' na' golle'ne' shaje' lljsoe' to latj dii bchebe' wi'ene' gakin che'. Na' wzee lalle'na' zeje' la'kzi bi wnezile' gan illine'.

<sup>9</sup> Na' daa benlilallee Chiozan', jsoe' ka ben' zit' lo yell-liona' bcheb Chioza' wi'ene'. Na' bene' lille'na' de lech', ka'kzə dii Isaaca' na' dii Jacoba', ben'ka' lekzka' goki chegake' daa bcheb Chioza' lao dii Abrahama'. <sup>10</sup> Na' dii Abrahama' jsoe' na', la'

nezile' wllin lla lljazoalene' Chioza' to latj wen daa ben kwin Chioza', daa bi te cheyin.

**11** Na' lekzka' daa benlilallee Chiozan', wyajli'e gon Chioza' ka soa xiiñe' la'kzi ba nake' ben' gol na' nakte dii xoole' Sárana' nool will. **12** Ka' gok wzoa ben' zan inlleb xiiñ dia che', ka beljka' llia xan yabana' na' ka yoxa' chi' cho'a nisdo'na' daa kono ibabi, la'kzi ba nake' ben' gol ka wzoa xiiñe'na'.

**13** Yog' ben'ki ni nonlilall'gake' Chioza' ka witgake' la'kzi lo yell-lioni bi wxi' wkaagake' diika' bçheb Chioza' wi'e legake'. Per wñezgakile' wllin lla gak ka wne', na' bibagakile' daa zi' gak. Na' wnagake' nakgake' ka ben' zit', ben' za' xtit shlollz lo yell-lioni. **14** Na' daa wnagake' ka', zejin ni chbezgake' gana' gak dowalj lallgake'. **15** La' shel' gokgakile' yella' gana' wza'gake' nakan dowalj lallgake', zak biyajgake' na' dii yoblə shel'ka'. **16** San legake' wzelall'gake' yillingake' yabana' gana' zoa to lallgake' dii wench. Daan, Chioza' bi chiyiile' daa nagake' nake' Chios chegake', na' ba nonshawee gana' lljazoagake'.

**17** Na' dii Abrahama', beena' bçheb Chioza' gak xiiñ dia che'na' ben' zan, daa benlilalleen' bzenague' che' kana' golle'ne' izani xiiñe'na', bi'na' nak tlish' tyaj, wite'b lao Chioza' kwenche gakbia' shi dii li nxenilalleene', **18** la'kzi ba goll Chioza'ne': "Xiiñ dia cho'ka' galjgake' lo xiiñ dia che dii Isaaca'." **19** Na' daa wyajle' dii Abrahama' nap Chioza' yel' wak yisbane' ben' wetka', wak iñacho Chioza' bisbane' xiiñe'na' ladj ben' wetka' daa biz bi'e latj wite'b'.

**20** Na' lekzka' dii Isaaca', daa benlilallee Chiozan', wñabile'ne' gone' ka gak wen che xiiñe' Jacoba' na'

Esaúna' llaka' zi' za'. <sup>21</sup> Na' lekzka' dii Jacoba', daa benlilallee Chiozan', ka ba zoa guete' wñabile'ne' gone' ka gak wen che chopte xiñ dii Joséna', na' de nchish'zi yag bar che'na' be'lawee Chioza'. <sup>22</sup> Na' lekzka' dii Joséna', daa benlilallee Chiozan', kana' ba zoa guete', bi'e dill' wlin lla yichej ben' Israelka' Egíptona', na' golle' legake' yisa'gake' llit wet che'na' kat' yilleshgake'.

<sup>23</sup> Na' lekzka' daa benlilall' dii xaxna' dii Moiséza' Chiozan', ka goljb' bkwash'gakeeb' shon beo' daa ble'gakile' ka xochi gokb'. Na' bi bllebgake' daa bchoglo faraónna' guet bdo'ka'. <sup>24</sup> Na' lekzka' daa benlilall' dii Moiséza' Chiozan', ka bgole' bi goonile' ina ben' nake' xiñ bi' nool che faraónna'. <sup>25</sup> Wyazlall'che' biya dii sak'zi'lene' ben' wlall che'ka', ben'ka' nak yell che Chioza', aga ka daa gone' dii malka' nak toldezə daa chibayi ben'. <sup>26</sup> Gokbe'ile' zak'chi kwell inę ben' che' ni che Crítona', aga ka daa si'e banez che yel' wni'ana' de Egíptona', daa bzoa yichje' dii wenna' we' Chioza'ne'. <sup>27</sup> Daa benlilall' dii Moiséza' Chiozan', bizee Egíptona' na' bi bllebe' illaa faraónna' le', san goke' wal daa wñezile' Chioza', beena' kono chle'i, wzoalene' le'.

<sup>28</sup> Na' daa benlilallee Chiozan', bene' lni Paskwa'. Na' golle' ben' wlall che'ka' witgake' twej xil'do'na' wxit'gake' xchema' yichj puert che'ka' kwenche anjla', beena' lljet bi' byo nechka', bi wite' bi' byo nech che'ka'. <sup>29</sup> Na' daa benlilall' ben' Israelka' Chiozan', gok bidegake' loo nisđo'na' le Nisđo' Xña, la' Chioza' bene'n chop laalə kwenche gok bidegake' lo yo billa'. Na' ka nan te ben' Egíptoka', to biyejzan na' wche'gake' yel.

<sup>30</sup> Lekzka' daa ben<sub>l</sub>lall'gake' Chiozan', bene' ka billee zeeka' nechj yell Jericóna' ka biyoll wyechjgake'n gall lla. <sup>31</sup> Na' lekzka' nool wdana' wle Rahab, daa ben<sub>l</sub>lallee Chiozan', blebe' ben' Israelka' lille'na' ka bllingake' jawia jayigake' lalle'na' na' bi wliayi'lene' ben' Jericóka' ben'ka' bi bzenag che Chioza'.

<sup>32</sup> Dii zanch dii de inia', per bich bi latj de wi'a dill' ka ben dii Gedeónna', dii Baráca', dii Sansónna', dii Jefténa', dii Davina', dii Samuela' na' dii ben'ka' wdixjee daa goll Chioza' legake'.

<sup>33</sup> Daa ben<sub>l</sub>lall'gake' Chiozan', wkaagake' yell-lio che ben'ka' wdil-lengake', na' wñabia'gake' xochi ka wyazlall' Chioza', na' goki chegake' daa b<sub>c</sub>heb Chioza' wi'e legake'. Na' Chioza' bisle' balgake' lao bell zniaka', <sup>34</sup> na' zi ba<sub>l</sub>e' bene' kwenche bi bzey yi' wala' legake', na' zi ba<sub>l</sub>e' bilagake' bi witgakile' spada'. Na' ba<sub>l</sub> ben' blan'ka', ben Chioza' legake' ben' wal, na' ka wdil-lengake' soldadka' nak ben' zit', bengake' legake' gan. <sup>35</sup> Na' Chioza' goklene' ba<sub>l</sub> noolka', bisbane' no xiñ che'ka' ba wit.

Na' zi ba<sub>l</sub> ben' biya dii b<sub>c</sub>hi' bsak' ben' legake' axt ka witgake' na' bi goklall'gake' kwej yichjgake' Chioza' kwenche yilagake' lao yel' zak'zi'na', daa bengake' lez gak wen chegake' kat' yisban Chioza' legake'. <sup>36</sup> Na' zi balgake' btitjgakile' na' bet wdin-gake' legake', na' b<sub>c</sub>hejgake' legake' gdenna' na' wdixjgake' legake' lillyana'. <sup>37</sup> Na' zi balgake' bet-gakile' yaj, na' zi balgake' wlejgake' chopl<sub>a</sub> kon sierra', na' zi balgake' betgakile' spad. Na' zi balgake' biga wzoa lill xlatjgake' na' bchingake' no xa xil'ka' no xa shibka' lwaa xagake', na' gok-gake' ben' yesh'do' na' dii zan dii ben ble'gakile'

daa b̄chi' bsak' ben' legake'. <sup>38</sup> Wdagake' latja' gana' bibi chashj ch̄leb na' do yaa yaoka', na' bi-gaangake' do xan blejka'zə na' no loo yech. Na' ben'ka' kana', ni lat' bi nan chidol'gake' soa ben' wenka' ladje'ka', shel'ka'. <sup>39</sup> Na' la'kzi Chioza' wyazlallee ka benlilall'gake'ne', ni togake' shlak wzoagake' yell-lioni bi ble'gakile' gak daa b̄chebe' gone' chegake'. <sup>40</sup> La' wlo'e x̄nezin kwenche aga to lezgake' yizi'gake' banez ka nak daa b̄chebe' gone', san cheenile' lencho yizi'cho banez che to dii zak'chi kwenche yog'cho yiakcho kwaslol ka cheenile'.

## 12

<sup>1</sup> Na' daa nezicho ben' zan ben'ka' wzoachechgake' benlilall'gake' Chioza', lekzka' cho' chiyal' kwej yichjcho yog' dii chllonan goncho ka cheeni Chioza' na' kwej yichjcho saaxyana' daa chombegui cho', na' soachechcho gonchcho ka dii le koochcho nez lo x̄neze'na' ka to ben' chxonj na' chgooyibe' kwenche gone' gan. <sup>2</sup> Chiyal' soacho wwiacho ka ben Jesúza', beena' chon ka chonlilall'cho Chioza', na' lekze' gaklene' cho' kwenche yiyyoll yido gonlilall'chone' kwaslol. La' le' bizo bizakile' ka betgake'ne' lee yag cruza', na' bi bene' kwent che yel' zto'na' wxi'e daa nezile' ka yiyyoll ile'ile' yel' zak'zi'na', yiba yizakile'. Na' naa chi'e gana' ch̄nabia' Chioza' shlaa de shli che'na'.

<sup>3</sup> Chiyal' koo yichjcho ka bizo bizakile' biya daa beni ben' malka' le' kwenche bi lljxakicho ni bi wshe'lall'cho gonlilall'chone'. <sup>4</sup> Na' ka nakle le', aga bin' x̄chenle wlaljle ni cheyi daa chdil-lenle

dii mala'. <sup>5</sup> Ba gol-lall'le daa wna Chioza' cho' daa nakcho xiine', ka wne':

Xiñdawaa, bi gonilo' nakzi yel' zak'zi'na' chselaa kwenche wzajniid' li',

na' bi yidinjilo' kat' chon' ka yiyakbe'ilo' daa chono'.

<sup>6</sup> La' nad' Chios, chigwaa shli lall' ben'ka' chakid', na' chsak'zi'a ben'ka' nak xiin'.

<sup>7</sup> Chtil-le yel' zak'zi'ka' kwenche yigooshlilall'le, la' Chioza' chonile' le' ka' daa nakle xiine'. La' aga ga zoa to bi'do' bi chsak'zi' xabaa leb' kwenche yigooshlilall'b'. <sup>8</sup> Na' shi Chioza' bibi gonile' le' kwenche yigooshlilall'le, ka chone' che yog' xiine'ka', zejin nakle ka ben' bi wyoo xayin.

<sup>9</sup> Kana' nakcho bi'do', xachoka', ben'ka' bisgol cho', bsak'zi'gake' cho' na' wdapchogake' balaan. Na' llialotech wzexj yichjcho wzenagcho che Xacho Chioza', beena' zoa yabana', kwenche gat' yel' mban checho zejli kanı. <sup>10</sup> Na' xachoka', shlak bisgolgake' cho' bsak'zi'gake' cho' kon ka gokgakile' nakan wen. Per Chioza' chsak'zi'e cho' kwenche gaklene' cho' gakcho ben' li ben' shao' ka nake' le'. <sup>11</sup> Aga no chibayı kat' chllagloe' yel' zak'zi'na', san le chakyeshile'. Per beena' yiyakbe'i cheyi daa chllagloe' na' yigooshlilallee, yisa' che wen na' soe' mbalaz.

<sup>12</sup> Li gondiplall', na' li gon ka dii le gonlilall'le Chioza'. <sup>13</sup> Li gon ka cheeni Chioza' kwenche beena' ba chshe'lall' ile'ile' ka chonle na' yiyondiplallee na' bi kwej yichje' Chioza'.

<sup>14</sup> Li gon byen soalenle yog'te ben' mbalaz, na' li wsa'to chele lega ben' nxi nyech lao Chioza', la' kono yillin lawe'na' shi bi nxi nyech

yichjlall'do'ena'. <sup>15</sup> Li gon byen gap wwia ljwell-le kwenche ni tole bi gonle daa wllonan si'le banez daa ba ben Chioza' chele yel' ben' wen che'na', na' kwenc̄he bi galj xe loo yichjlall'do'leka' dii mala' daa wxinj wlenan ben' zan. <sup>16</sup> Na' ni tole bi talenle no xiin̄ xool ben'. Na' bi gonile nakzi daa nak che Chioza', ka ben dii Esaúna'. Tyeeñz yel' wawa' bsha'ile' daa nan gaki che' daa nake' ben' nech. <sup>17</sup> Na' nezkzile ka wde, goklallee inab xe'na' gak wen che' daa nake' ben' nech, na' bich gokan. La'kzi le wchelle' wñabile'n xe'na', bich bi gok gongake'.

<sup>18</sup> Aga ka gok che dii xozxto'chokan' chak chele. Legake' wbig'gake' kwit yaa Sinaína' na' ble'gakile' chal'ninan, axt wche' chola'n, na' wzen to be' wal, <sup>19</sup> na' bengakile' wchell trompeta' na' wñe Chioza' legake'. Na' ka bengakile' shi'na' got'yogakile'ne' bich inie' legake', <sup>20</sup> daa le bllebgake' daa goll Chioza': "Nottez yidlej lo yaani chiyal' wítilene' yaja', laa ben' laa bayix'." <sup>21</sup> Daa ben ble'gakile' le bsheban legake', axt kwin Moiséza' wne': "Axt chxiztit' daa le chllebchga'."

<sup>22</sup> San le' ba wbig'le gana' zoa Chios, ben' yaa ben' banna', gana' le yaa Sión na' Jerusalén daa zoa yabana', gana' lle' lla' ben' zan inlleb anjl che'ka', <sup>23</sup> gana' ndop nllag ben'ka' nak xiin' Chioza', ben'ka' nak ka bi' nech, na' ba da' lie'ka' lee libr che'na' de yabana'. Na' ba wbig'le lao Chioza', beena' yizi'e kwent che yog'lol ben'. Na' ba nakcho txen ben' li ben' shao'ka' ba wit, ben'ka' ba biyon Chioza' dowalj ben' li ben' shao'. <sup>24</sup> Lekzka' ba wbig'le lao Jesúza', beena' be' yel' mban che'na' kwenc̄he bxie' dii koba' daa nc̄heb Chioza' gone'

checho. Na' x̄chene'na' daa blalje' ni checho chaklenlan cho', aga chonan ka x̄chen dii Abela' daa wdao xya che dii ben' bisheena'.

**25** Li wsak' kwenche bi gakle widenag lao Chioza', beena' chne cho'. La' shi ben' Israelka' bi bilagake' lo yel' zak'zi'na' daa bi bzenaggake' daa goll Chioza' legake' lo yell-lioni, alechlə cho', aga wilacho lo yel' zak'zi'na' shi yizechj koll'cho beena' zoa yabana' na' bi wzenagcho xtilleena'?

**26** Ka wñe Chioza' ben'ka' kani'yi, shi'ena' benan ka wxo' wñib yell-lioni, per ñaa ne': "Sto shii gon' ka xo' inib yell-lioni, na' aga toz yell-lioni, san lente yabana'." **27** Na' daa ne' "sto shii gon' ka xo' inib", zejin yinit yog' diika' bene', diika' te cheyin, na' yigaan diika' biga te cheyin. **28** Na' yel' wñabia' daa gon' Chioza' cho' gana' zoe', biga te cheyin. Daan, chiyal' we'chone' yel' choxken na' we'la'ochone'ka chazlallee na' gall illebchone'.

**29** La' Chios chechona' nake' ka to yi' wal daa chzey chte.

## 13

**1** Li soatezi soa gaki ljwell-le ka chakile to ben' bish' goljle. **2** Na' bi gal'lall'le wbleble ben' loo yoo lillle na' we'le legake' ga yigaangake', la' bal ben'ka' ben ka' blebgake' anjlka' lille'ka', la'kzi bi gokbe'gakile'.

**3** Li lljadini gaklenle ben'ka' de lillyana', na' li gaktezi lenzlen chak chele ka'. Li gaklen ben'ka' chiya dii chchi' chsak' ben' legake', na' li gaktezi lenzlen chak chele ka'.

**4** Dii wen inleb daa ne' nkaa che', na' le' nshagna'le bi chiyal' talenle ben' yobla, la' Chioza'

wsak'zi'e nottez ben'ka' soalengake' nool bi nak  
nool chegake' wa ben' byo bi nak ben' chegake'.

<sup>5</sup> Bi chiyal' selall'cho yel' wni'ana', san goncho  
banez ka'k' dii de checho, la' Chioza' ba wne': "Biga  
wsan'li' ni bi kwej yichj' li'." <sup>6</sup> Daan, wak iñacho do  
yichj do lall'cho:

Xancho Chioza' zoe' chaklene' nad'.  
Na' bi gall illeb' shi bi goni ben' nad'.

<sup>7</sup> Na' li lljadini ka ben ben'ka' bli' bsedi le'  
cho'a xtill' Chioza'. Li wwia ka wzoa wlezgake'  
ben\_lilall'gake' Crítona' toshiizi, na' li gon\_lilallee ka  
ben\_lilall'gake'ne'.

<sup>8</sup> Jesucrítona' biga chillee, lekzen' kani'yi, lekzen'  
naa na' lekzen' zejli kanı. <sup>9</sup> Bi we'le latj no wli'  
wsedi le' dii yobla' dii chyiljlall' ben' dii gonan ka  
yilaale lo nez li che Chioza'. Wenchan wzoochech  
yichjlall'do'choni lo yel' chaki che Chioza', aga ka  
daa sho'z yichjcho cheyi diika' na ben' bi chiyal'  
yeej gaocho. La' ben'ka' chinal' chinogake'n bi  
chaklenan legake'.

<sup>10</sup> Daa ba wit Crítona' ni checho, ba chizi'cho to  
banez daa bi bizi' bxozka' bet bayix'ka' gana' wzoa  
lill xlatj Chioza' daa bengake' de lech'. <sup>11</sup> Bxoz  
choo bxoz xenna' jwee xchen bayix'ka' Latja'  
Gana' Zoa Chioza' kwenche yizi'xene' xtoleeka',  
per bchejgake' latja' gana' wchengake' kwenche  
jazeygake' kwerp che bayix'ka'. <sup>12</sup> Na' ka'kzan  
gok che Jesúza', lekzka' wlejgake'ne' yell'a ka bet-  
gake'ne'. Na' wlaj xchene'na' kwenche yisol  
yinite' saaxya che ben'ka' gon\_lilall'gake'ne'. <sup>13</sup> Na'  
cho' naa, chiyal' nocho Crítona' la'kzi le gakzbani  
ben' cho' ka gokzbangakile'ne'. <sup>14</sup> La' yell-lioni  
gani zoacho nakan dii te cheyin, per noncho lez

yillincho gana' soacho zejli kani. <sup>15</sup> Daan, chiyal' we'la'ocho Chioza' toshiizi daa wit Crístona' ni checho, na' koochone' balaan kon cho'a loll'choni we'cho dill' len' nake' Xancho, la' lennan' nakan ka dii chzanicho we'chone'. <sup>16</sup> Bi gal-lall'cho goncho dii wenna' na' izanicho bi de checho we'chon ben' chyallj chchinile'n, la' lennan' chazlall' Chioza' na' daa choncho ka', len' choe'la'ocho.

<sup>17</sup> Li wzenag che ben'ka' chli' chsedzi le' na' li wlexj yichjle lawe'ka', la' legaken' chap chwiagake' le' daa yoo yichjgake' wllin lla yidegake' kwent lao Chioza' daa bengake'. Li wzenag daa nagake' kwenche yibagakile' gon xshine'ka' na' bi gakgakile'n to dii lallj. La' shi bi wzenagle che daa chli' chsedgake', bibi banez cheyin si'le.

<sup>18</sup> Li inabi Chioza' gaklene' neto', la' nezyen' into' chonnto' ka cheenile', na' cheeninto' wsa' chento' wen lao yog'lolte. <sup>19</sup> Na' chat'yoid' le' inabile Chioza' ni cha' kwenche yob gak yid' sto shii gana' zoale.

<sup>20</sup> Chioza', beena' chzoe' cho' mbalaz, bisbane' ladji ben' wetka' Xancho Jesucrístona', beena' chap chwia cho' ka chon xan xilaa, beena' choe'la'ochga xil' che'ka'. Na' lekzen' beena' bxé daa bcheb Chioza' gone' checho zejli kani kana' blalj xchene'na' na' wite'. <sup>21</sup> Na' Chioza'kzə gonshgue' ka gak gonle dolol dii wenna' ka cheenile' gonle, na' gonshgue' ka gaklen Jesucrístona' le' gakle ka chazlallee. ¡Sho'shgue' balaan zejli kani! Ka' gakan.

<sup>22</sup> Chat'yoid' le' ben' bish' na' le' ben' zan', li koo yichjle diiki chnabid' le' gonle, diiki to chop cho'a ba bzej'. <sup>23</sup> Na' cheenid' inezile ba bichej ben' bish'cho Timotewa' lillyana', na' shi ba wdaile' yide' ni, na' wchi'ané' yidwianto' le'.

**24** Li wwap chiox yog' ben'ka' chli' chsedi le' na'  
yog' ben'ka' nakle txen nakle lall' na' Chioza'. Na'  
ben' Itáliaki nakcho txen chwapgake' le' chiox.

**25** Chioza' gaklenshgue' yog'lol-le.

**Dill' wen dill' Kob Che Jesucristona'  
New Testament in Zapotec, Cajonos (MX:zad:Zapotec,  
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Cajonos

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

**2014-04-30**

---

**PDF generated using Haiola and XeLaTeX on 11 Nov 2022 from source files  
dated 29 Jan 2022**

**f98bf0c8-4467-559d-82ab-96644a44d38f**